

四庫全書

集部

欽定四庫全書

集部

句曲外史集補遺卷

上至
下

詳校官編修

臣范來宗

中書

臣劉源溥覆勘

覆校官中書

臣

呂雲棟

校對官中書

臣

朱炘

謄錄監生

臣

陳昌敬

欽定四庫全書

句曲外史集補遺卷上

元 張雨 撰

古詩十首

不愛崑岡玉不愛江漢珠
愛已有蒼璧有之利有餘
吾生為我有其利當何如
論爵不足貴論富不能踰
達生命之情順生以自娛

又

荆人有遺弓索之將奚為
且荆人遺之乃荆人得之
孔

子聞之曰去其荆可耳老聃聞則曰去其人可矣天下有至公孔聃得其理天地且弗有莫知其所始

又

墨子歎染絲所歎一何長染於蒼則蒼染於黃則黃奚獨染絲然染國在所當有染如伊臯禹湯稱聖王殷紂染惡來既染國亦亡染士如孔聃死久道彌光

又

魯君聘顏闔踰垣避使者我非惡富貴君胡獨不捨全

生以為上迫生以為下當知得道人治國其土苴

又

虞人百里奚所鬻五羊皮有得其說者乃是公孫枝獻
諸秦穆公四境不足治賢者倘不遇後世誰當知

又

昔者齊桓公往見小臣稷一日凡三至欲見且弗得驚
爵固輕主驚霸亦輕士大夫縱驚爵驚霸吾敢爾所以
終見之不為從者止誰云內行缺論霸亦可矣

又

桓公遇甯戚飯牛中夜起賜之以衣冠一說境內理再說為天下桓公以師事衛與齊不遠安用疑客子不患有小惡所患亡大美且人固難全用長當若此

又

業煩則無功禮煩則不莊令苛則不聽禁多則不行國人逐狡兔因之殺子陽嚴刑無所赦適見召亂亡

又

齊有善相狗假買取鼠者數年不取鼠畜之不如捨相
曰實良狗志在麀麀鹿欲觀取鼠能請桎其後足桎足
乃取鼠淹爾驥焚氣安得忘言徒喻此鴻鵠志

又

燕雀爭善處處在大屋下姁姁甚相樂子母得相哺一
朝竈突決火炎屋棟燬燕雀色不變不知禍及已人臣
私聚歛迷國壞綱紀孰謂斯人智不如燕雀耳

獨酌

靜極忽不愜掩書曝前軒柴木樊四維時禽托孤園羣
物方趨功吾衷恒晏然本乏超世才偶脫區中緣妙理
寄濁醪嘉名愛靈仙從吾所好耳富貴須何年

天池石壁為鐵雅賦

嘗讀枕中記華山閼中吳神泉發其顛青壁繚其隅春
風四山來羣綠互紛扶羽觴曲折行浮花與之俱採珠
搴薜荔洗玉弄芙蓉聲更頗好名石窪作魚湖鴻乙志
草堂挑烟遂成圖而此滌煩磯閱世如擣蒲發興雲林

子盟手與我摹居然縮地法挈入壺公壺

遊虎邱次東坡先生韻

日出東海頭虎氣踞茲嶺渴心望氣往解后轆轤井寧
若軍中拜奔泉酌老耿莽邱專鬼物陰壑雜蛇黽魚腸
卧池底百鍊豈重礦以問神物化後日屬吳猛怪蟒既
血刃大道孰爭騁我行須人扶鳩杖慚祝哽小吳不滿
眼坐納三萬頃化國方日長霸業久灰冷淞水翰歸吳
遇溪柳遷永吾非斯人儔短句惜流景茶烟寄禪榻弄

我鬢絲影散人初無號奚必煩上請

次倪元鎮遊虎邱

振屐稍踐危援藤遂支滑尚餘金玉氣山川相應發沼
吳不滿眼軒中樹如髮花覆闔閭城石繞生公榻適與
幽人携及茲暮春月坐久得忘言移鞞蔭清樾

答寄筍蔬

遠寄玉山篇來自故人廬竹萌且柔弱荻筍亦豐腴薑
醯助芳辛濁醪為前驅猪肝恐累人我亦仲叔徒念此

風雨中江外致嘉蔬東詩答幽意老饕良可吁

冬夜震澤風雪異常

晴燠不可恃一夕冬令變屢忘和煦恩惟曰祈寒怨老
屋雪沒隙廣澤風肆便反覆鼓洪濤揚簸塞荒塹隱然
洞庭樂勇盛闔閭戰萬物芻狗如埋沒加蹂踐凌晨枉
嚴汜野日復葱蒨仁哉天地心觀復斯可見

上方教寺

橘林千黃金林靜路逾僻忽臨消夏灣雲海浩如積綺

季不可追空餘騏驥跡

贈倪元鎮

龐公有名言魚鳥托棲止而其遺子孫亦在安而已子
有邱壑趣文弱與時背強梁方蛇吞貪黷亦虎噬何以
犯多難適為田業累深泥沒老象自拔須勇志連環將
誰解旦暮迭興廢所以明哲徒置身興廢外賢者蘧伯
玉知非復何悔

夕佳樓

西山朝氣爽南山夕氣佳朝爽人共忻夕佳吾所懷
僧閱世久結廬深避乖蕙樓將對峙菌閣亦雙排維南
列崇阜不受烟嵐霾我亦遲莫人心迹倦鳥偕茲焉記
高躅庶與靜者諧

過太湖

滌滷魚龍戲僻側鳬鴈宿併吞三萬頃寧不為小曲唯
應鳴夷子曾泊西山麓

毛公壇

方壇蔭奇竹儼彼毛骨秀想見黃眉公時來濯冰溜一
往不可得尚問何日又

黃公泉

黃公鍊藥處遺井茲邱上何年一泓碧褒博照容狀不
意樵者歌猶聞紫芝唱

華山寺三泉

寺以華山名一一靈泉瀉會昌舊文字毀壁存牖下往
劫蓮花開曷以信來者

奔月卮歌荅鐵雅所作

甕社明珠奔八月脫殼政似風蟬潔漁網出之不敢視
滌盡含沙光不滅文昌四星吞在腹一一金晶大如菽
蜃物還來作飲器日夜雄雌繞林屋一扇桃核寬有餘
半葉焦心卷未舒飲非其人躍如水怪雨盲風生坐隅
置之天上白玉盤斗柄挹酒長闌干李白跳下鯨魚背
持勸我飲相交歡幽宮馮夷為予泣酌盡海水百怪出
還我平生老蚌胎許君醉卧鮫人室

悼薛玄卿

玄卿難再得本是餐霞人高懷獨超物洞鑒亦絕倫君
自江東我吳下早歲聯翩侍金馬御榻賜書凡一束仙
苑偷桃動盈把紫虛元君之玉訣青城先生教我者感
君多道氣探懷為君寫學士承旨平原公許我與君揚
缺同一時標名兩外史羽衣白茅立下風我還句曲廿
餘載君乘輶軒歷烟海歸錦橋西結草樓樓中袂被長
相待風烟山水共追尋福臨洞口話離心年深書字化

為碧白首蒼茫成古今聖井山崩數千尺君從羣龍去
無迹困頓鹽車篠嶺頭此日思君復何益

玉笙謠為鐵門笙伶周奇賦

我有紫霞想愛聞白玉笙縣匏比竹無靈氣昆邱採此
十二莖鳳咮銜明珠鳳翼排素翎金華周郎妙宮徵子
晉僊人初教成月下吹參差羣雛亦和鳴緱氏山頭白
雲起七月七日來相迎長謝時人一揮手飄下滿空鸞
鶴聲

奉贈魯學士

閣道如珠環太極天風浩蕩曳天裾雲行龍尾隨金仗
日照螭頭侍玉除四海聲華周典禮一時人物魯璠璣
願臻咸際無為化寧讀人間非聖書

鳳皇山懷古

江右夷吾浪得名豫州英槩亦沉冥夕陽枯木山如赭
秋雨荒臺草自青漢苑玉魚誰復葬昭陵石馬亦無靈
可憐白髮商人婦猶向燈前話後庭

題西湖何氏隱真館

雞犬雲中豹一斑路隣仙冢昔躋攀
說經僧去黃龍卧負藥童歸白鶴閑
酒仰秫田陶令宅井分丹水葛洪山
不因草結昭臺約此地從知幾往還

次孫大方仙興詩韻

仙仗來時瑞霧屯真人玉女侍靈軒
亭亭珠穗香烟直爛爛樽桑玉色溫
華雨掃塵鸞帚濕島雲承襪蜃樓昏
至今星斗天壇夜望拜青都虎豹門

送人之茅山

桃竹齊眉草屨柔江雲濕重木綿裘茅山一去五百里
楚月相望十二樓林下甌香黃獨月松根鉏冷茯苓秋
藥瓢料得歸來滿多病微軀我亦求

題桐栢觀

百折丹梯杪萬松鳳笙臺殿赤城鍾親從海上求司馬
寧復山中起卧龍瓊闕排雲窺坐席銀橋乘月認仙蹤
真人及此東行日笑說盧敖向九峰

鶴冢

鶴壽千年定有無
羽衣蟬蛻雪模糊
樵人與裹玄黃帔
少保親傳粉墨圖
坏土未乾青草短
三山何在白雲孤
夜寒蕙帳應岑寂
初向華嵩覓鳳雛

雨懷郭子昭御史

洞天霾雲晝不開
大茅南面水縈迴
深山此日蛟龍喜
舊雨故人驄馬來
礪道浮槎高寄樹
石幢陰篆濕生苔
銷愁底用金陵酒
賸引窪尊枕瀑雷

寄倪元鎮

雨天初寒雪復作春風相欺何太顛誰依井竈皆獸迹
獨擁書冊猶鳶肩枸杞埋根乍難斲櫻桃放花殊可憐
賀監宅前舊遊處快放柳條維酒船

次韻元鎮

衣桁常容蛛網懸石牀渾讓女蘿牽道術何煩孔郎祀
屋廬政用郤超錢泉崩澗底歸樵路雨壓厨頭蒸术烟
誰見西鄰折書後一枝風竹鵲鳩眠

懷茅山

我有草堂南洞門常時行坐虎同羣丹光出林掩明月
玉氣上天為白雲遙憶田泉洗蒼術更思陶澗采香芹
歸來閉戶償高卧莫遣人書白練裙

題元章研山圖

南宮米老書無敵同盟亦有薛河東研山自昔懷清賞
石友令人拜下風華蓋天壇承露潔月巖空洞與天通
絕憐古學龜城叟一一題詩取次工

梅雪齋雅集分題得酒香

醲郁芬香味更嚴
甕間飄滿讀書簾
絕勝金鴨薰花氣
錯認山蜂釀蜜甜
三嗅初令消渴止
一中定掃宿醒淹
醉翁鼻觀還親切
不待狂僧寫布帘

折蓮花寄韓伯清

大八河溝錦作堆
一花初照夜明苔
濯纓歌向滄浪去
執蓋郎從碧落來
天水染雲如淨練
露盤食玉似空杯
韓家公子多才思
乞與香奩相對開

水竹居為湖州沈自誠賦

我愛茗溪溪上居琅玕千箇繞吾廬
早知竹葉仙舟夢合誤榴皮醉墨書
屋底煖雲蒸汗簡月中清露滴方諸
鄰家已訂浮家約乞我長竿學釣魚

次韻荅吳興黃伯成

行盡松陰黃葉株三叉路口問茅廬
青山對語惟捫蝨落日催歸獨跨驢
土木形骸嵇叔夜波瀾文字木玄虛
殘年記得相存問莫道天寒無鯉魚

過吳興謁趙承旨

兩岸人家洲渚生滿城山色與溪聲
船過鷗邊掠浮玉雲移木末見飛英
書淫畫聖王孫老雪霽沙晴湖水清
洞經不用驚羣換也許山陰道士迎

松花餅

怪來粃粒作鵲黃渾是蒼髯九粒香甜味中邊
唯食蜜苦心早晚待休糧仙人騏驎留看取
道士嵩陽遠寄將笑比紅綾春餡巧齒牙根底嚼糖霜

贈別休休菴了堂上人

老僧十年不出戶袈裟搭架風披披祖衣留在阿蘭若
佛法傳過高白麗客牀雪練一甌茗經藏苔昏三尺碑
不向舊房看偃蓋卷中原有古松枝

宿瑪瑙寺

一宿葛洪丹井上化為蝴蝶夢魂清湖田涼蛤四散吠
烟寺曉鐘相遞鳴孤嶼橫陳為玉几初陽煥爛似霞城
拏舟又入水雲去還我風篁雪竇聲

寄訢笑隱

繡經臺畔惜分携，華蓋峰前幾夢思。
一席地分眠鹿草，三更月在掛猿枝。
我書安能半袁豹，君才端倍十曹丕。
一番畫逢虞祕監，不嫌頻竄仰山碑。

大滌山

此峰屹立浩無前，信是人間別有天。
銅柱何煩天北際，蓬山寧在海東邊。
采樵巨箬多無骨，搗藥靈禽或是僊。
老我不能為狡獪，峰頭看月幾回圓。

丹泉

涵淳萬象一泓中欲探靈源未易窮
丹窖久埋泉眼赤珊瑚長浸石頭紅
評來水味羞揚子收取沙牀贈葛洪
一醉流霞三萬日年年分給羽人宮

天池樓

天池一樓小如架檠出半天天雨華山圍丈石獅子座
寺屬三朝母后家時呼白猿聽奇句亦許飛仙食紫霞
我來把斷朗風口只留牀角置袈裟

牧之水榭

有序

杜樊川水榭在義興東郭宋紹興間即其地
創招提今廣福精舍是矣僧古田築屋三間
仍以水榭名牧之寄許侍御詩有云塵意迷
今古雲情識卷舒他年雪中棹陽羨訪吾廬
刻石為山中故事古田諸孫易道上人從予
遊求為賦詩往題其處好事來續未艾也

愛此招提絕世氛何因水榭得名聞幽篁嘉木知誰共

塵意雲情若箇分
陽羨溪頭黃葉路
晚晴賦裏白鷗羣
詩僧文采居然別
解道曾留杜使君

同張德常遊張公洞

騎入秋雲罨畫間
日出洞靈猶啓關
東皇衣覆雲霧海
玉女盆盛人鳥山
牽驟步步踏石髓
投龍往往祝金環
茅家小吏向塵土
弭節相遲明當還

題趙松雪怡樂堂圖

幽人結屋傍江干
怡樂名堂只數間
黃鳥隔簾詩夢醒

紫鱗供饌釣舟還
簷前景色春常在
柳外柴門晝不關
誰識箇中真樂處
陶然天地一身閑

馬塍新居

浮家泛宅意何如
玉室金堂計未疎
歸錦橋邊停舫子
散花灘上作樓居
澹然到處自鑿井
玄晏閑關方著書
但得草堂貧便足
人間何地不樵漁

西湖放燈

共泛蘭舟燈火開
不知風露濕青冥
如今池底休鋪錦

此夕槎頭直掛星爛若金蓮分夜炬空於雲母隔秋屏
却憐牛渚清狂甚苦欲燃犀走百靈

雲巢樓

初陽臺上白雲多雲裏層層玉樹歌棲息一枝緣未穩
飛翻千仞奈危何雨中幕燕雷驚起峰頂笙鸞目送過
好在丹梯無百尺屋頭看盡白鷗波

菌山

結茅依菌山焚香好芝蓋真靈幸憫我冠佩時來會

羅姑洞

事見真誥

蒼梧眇天末聞有綠毛仙却過華陽路人間九百年

霞架海

衆水會一壑天近發霞光晨興新沐竟晞髮向朝陽

鶴臺

上有白鶴翔下有幽人居幽人道當成白鶴來不虛

桐華源

伊誰植斯桐萋萋滿幽谷鳴鳳久不聞何當一來宿

玄洲精舍

梁周處士弘讓題
桓真人壁不別撰

子有鸞鶴想甘同麋鹿遊懸榻應待我分我半玄洲

紫軒

林君已仙去紫軒名尚存丹光時或現鼎藥夜常溫

火浣壇

林真人火解事
見采真游篇

真陽以解形四大何足靳指窮以為薪火傳不知盡

隱居松

真人在山日所至樹以松當知千載下遺子以清風

玉像龕

我有紫虛像白玉雕琢成貢之華陽天萬年蘄降靈

題拜石圖

一代清狂海嶽老世間簪紱更須論却憐种放樵夫拜
不到奇章宰相門

來鶴亭

華表歸來舊令威曉風將夢上天飛
緱山借與浮邱伯
一曲瑤笙月下歸

來鶴亭即席賦

草堂孤鶴駐樊籠忽有鸞笙下碧空待喚羽衣相向舞
呂家園裏看春風

題鶴亭所藏馬圖

九霄天馬俱龍種四十萬蹄雲錦斑一自漁陽鼙鼓後
不知幾箇到驪山

苔溪草堂

傳語幽人范叔豹霧隱何時窺一斑天下草堂隨處取

無此玉湖浮玉山

吳興道中四首

晴港陰塍乳犢眠
涼風綠鬢颺綠烟
埋名慚愧蘆中老
坐閱江湖逆順船

又

風捲灣碕半折蒲
意行弄水不嫌迂
筆牀正掠鷺羣過
疑殺山陰染翰圖

又

眠溪大樹不見日
牧鷺小兒兼釣魚
南風相送玉湖口
舟子飯時吾讀書

又

扁舟偶起采樵風
題扇書裙莫惱公
何處人間無六月
碧瀾堂上雨聲中

湖州竹枝詞

臨湖門外是儂家
郎若閒時來喫茶
黃土築牆茅蓋屋
門前一樹紫荊花

鯉魚

桃花鯉魚世常有萼菜鱸魚浪得名試喫江南鯉魚尾
侯家無此一杯羹

題授經郎獻書圖

侍書愛題博士畫日日退朝書滿牀奎章閣上觀政要
無人知有授經郎

次韻劉師魯吳山清暉亭三首

鳳去簫韶空隱隱鶴棲臺殿舊層層浮屠立盡千秋雪

誰倩風鈴說廢興

又

萬瓦連雲人世空
一雞啼日海波紅
欲窺倒影清漠外
故著危亭紫翠中

又

故山茅屋破仍欹
惆悵西風日夜吹
今日偶來高處望
嚴家亭上立多時

初陽臺

初陽臺上新亭好一曲笙簧石壁開驚起玄真狂道士
步虛飛下玉清臺

西湖竹枝詞

光堯內禪罷言兵幾番御舟湖上行東京鄰舍宋大嫂
就船猶得進魚羹

贈筆生沈君實

玉堂弄翰青錢選聞道吳興屢出奇何事君家苔蘚壁
醉仙留句只榴皮

揭學士過武康山中十日薛外史江東未至二

首

南鎮行香揭夫子歇馬走入計籌山杜尊師去白石在
翻動琳瑯翰墨間

又

一杯愛渠蒸蕨香一盤勸我苦筍涼飽食翻疑得詩瘦
不如頓頓地椒羊

宿天申宮二首

借渠靈壇一枝竹穿雲度險不須扶為尋石榻羅衣字
執火照徧青珊瑚

又

藥苗松菌紅斑斑綴風烟俎豆間簋輿三日半醒醉
春雲只戀銅官山

句曲外史集補遺卷上

欽定四庫全書

句曲外史集補遺卷中

元 張雨 撰

上卷諸詩吳興閔康侯辛巳秋寄余續刻者偶讀架上元人集又得聯句一篇

學詩齋聯句

至正甲申蜡月望前二日句曲張外史天雨
自義吳還錢塘其老友某僑居因宿外史于
客樓時吳興郊韶九成亦在焉予舊嘗喜與
外史聯句是夜將為之而未得韶作而言曰

生以學詩名齋亦有志於溫柔敦厚之教也

儻二先生即是為題生幸多矣用一笑從其

言詩將終而予怯寒先就寢明旦外史亟歸

且屬以足成之為之補就吳人陸友善隸韶

乞寫二紙一張於齋一寄外史云鄭元祐識

明良賡歌基猗那奏鼓始清廟殊讎讎祐赤烏固几几

豈惟緇衣賢雨政以朱襮美原鵠兄弟急祐河魴父母

邇便施谷中葛韻亦采體下菲詠桑表沃若雨歌萊賦

樂只

韶

鮑譖蘇公絕

祐

厲懷凡伯恥思鳴卷阿鳳

雨

願

繪袞衣

韶

蔽以思無邪毋曰鼠有體

雨

言超授簡貢

祐道在過庭鯉

雨

遂去文辭害亦屏訓詁昧譎諫主風

刺

祐

昌言發興比雅亡繼麟筆

韶

和寡續巴里鎬罷魚

在藻屈倡鳬汎水

雨

絙絃誰與奏補苴自難擬哀哀河

梁別

祐

堂堂沛風起

雨

祠雒悔心萌

祐

決虞壯圖已塞

瓠恨第鬱

祐

援桂慄藿靡便啼城上烏

雨

猶恨水中沚

祐

隆中抱膝想許下橫槩偉體要必中度

祐

葩正悉循

理

雨

響當貫珠串

祐

輟始輳車軌

韶

清圓斲氷苦

雨

穎

脫扣鍾喜

韶

無題白乃聖有作甫良史

雨

險如橫空盤

突若破陣褫

祐

雕鏤百神困策役萬象靡

雨

爨桐聲玉

明廟樂厭石齒揮毫既凌厲賦物斯須委

祐

郊公學方

篤吳歆好誠鄙

雨

蕭齋扁佳名華構落新址詩律妙獨

造吏塵淨一洗瑰辭出語穿遺經貯腹笥

祐

道在用服

形神悟為洗髓

雨

不虧素王造信全幽人履腎胃苦搯

擢物累困成毀直登陶韋奧旁摩鮑謝壘談凌天策燉

古偕靈光巋請驗百世傳致慎一匱圯兩老皆苦心六

義始盈耳挂一真萬漏

祐

聊以示吾子

雨

華亭康與可從長安邸舍見蕉池積雪詩卷錄以寄余余藏笥中十年矣偶從敝笥中見故人遺蹟因錄之

舊有漢銅洗一作碧玉色受水一斗後有贈白

石上樹小芭蕉吾因置洗中名曰蕉池積雪彷彿

佛王摩詰畫意賦詩一首羣公時多次韻僅存

師魯二篇

洗玉之池割圓嶠上有玉苗甘露零雪山凝寒壓太白
海氣正綠灑帝青是身非堅須長物絕境無夢遺真形
寧令嚴霜凋翠草詎勝失水哀銅瓶

劉汶次韻

銅駝陌上得銅洗曾見漢朝風露零寒光未變劫灰黑
古色猶帶宮苔青金人墮淚漫懷古玉女洗頭真寓形
與君作池媚蕉雪何以報之雙玉瓶

又

仙掌金盤別風露人間琛寶多飄零忽有銅洗土花碧
側想玉女雲鬟青千年偶在聊寄意萬物終毀無逃形
吾徒汲古寧玩物願予及泉資綆瓶

倪瓚

昔張外史有古銅洗種小蕉白石上置洗
中名之曰蕉池積雪軒西園老人追和張
劉二君詩書挂軒中予亦為之次韻

雪中芭蕉見圖畫蕉池積雪終凋零風翻窗裏浪花白

雨壓牀頭雲葉青詩人超軼有遠思造物變幻難逃形
爾亦林居喜幽事曉浥石溜攜銅瓶

書張伯雨蕉池詩後

右海昌張伯雨蕉池積雪詩一篇其稱羣公次韻僅存
者劉師魯二篇伯雨之為蕉池積雪去今十餘年吳江
村叟周君為蕉池積雪視伯雨所為無少異周君喜其
暗合也求書其實併詩以表之始周君豐于貲財好蓄
古玩器無何兵起其貲與故物一昔蕩然俱盡惟守小

屋數椽日以此為娛悅人以是多之伯雨已矣在承平時稍為清峭殊特者而周君當事變之際不隨衆境而逝而乃創意于此又其奇也雖然氣化盛衰之數恒相迭而無窮也以金石之堅者不能外此而待人獨于一草之微而致意焉者其亦有所寓矣夫何寓哉妍媸巨細不可得而擇也消息盈虛不可得而加也彭殤生死不可得而齊一也自達生而言之無不曰我于物無滯也而又何校乎然則蕉池積雪之趣固不可以形器求

之也求其趣者舍詩無以也余既書伯雨之詩而又書其始末如此至正庚子七月十日華蓋洞著書者饒介識

余從泖上購元人耕漁軒卷前有楊孟載說後有姚少師跋其間題贈詩篇倪元鎮而下皆一時如雷如霆之偉人蓋為太湖大隱徐良輔而作者張伯雨其一也

耕漁軒

幽人薄世榮耕漁夙所喜朝耘西華田莫釣洞庭水浮湛干戈際無譽亦無毀釀秫雲翻甕鱸魚雪飛几客來

具盃酌客去味經史緬懷清渭濱何如鹿門裏往者不
復見斯人亦云已努力勤所業庶免素餐恥

陳眉公嘗謂余曰余山中藏伯雨楷書詩七
首後云上雲林清閬閣下希是正之益句曲
張天雨起首惜未曾見又云趙魏公宋秀王
之後其子仲穆喜畫墨蘭張伯雨戲題一絕
于上仲穆見而
愧之蘭遂絕筆

題墨蘭

滋蘭九畹空多種何似墨池三兩花近日國香零落盡
王孫芳草遍天涯

壬午孟夏山中採茶僧至康侯復寄
逸詩若干首余去其重者而補焉

題趙仲穆竹西圖為楊元誠

問訊揚雄宅深居在竹西
風林宜月影春日聽鶯啼
東老應同樂南隣憶舊題
東風又花草相與友幽棲

酬虞道園

一函真籙是遺書想為焚香謝紫虛
海上安期分食棗人間長史合縣車
泥丸日月存思否華蓋烟嵐筆札餘
絕嘆清詩不埋沒解隨霜葉墮山居

中庭古栢

庭中異栢前朝物
銅柯石幹兀青蒼
雲聲終憶老蛟卧
珠樹獨留威鳳翔
月上團陰移覆砌
雨餘古香飄近牀
丈離疏者深根在
閱盡世人還久長

馴鷺

孑然馴鷺雪霜明
下瀨求魚自在行
碧玉燈檠雙足瘦
白麻衣袂一身輕
海鷗見事應何晚
凡鳥題門也不情
輸我駕行舊儔侶
舉頭寥廓總雲程

題雪景三香圖二首

春雪無聲入畫堂東風渾似北風涼祇緣何遜題詩少
信是徐熙落墨強青鳥下迎羅襪步蒼髯來近玉臺裝
匡廬也入幽閨夢睡裏山花各自香

又

雪羽飛來雪意濃國香狼藉暝煙叢倩誰與剪吳淞水
愛爾能吟柳絮風翠袖佳人玉跳脫平頭奴子錦薰籠
劒南畫手看前輩着粉施朱或未工

輓貢正甫經歷

親闡晚歲斑衣樂蓮幙秋風綠水香
范氏清名滿吳會
朱公遺愛在桐鄉
淮山招隱推奇逸
彭澤疏封盡顯揚
却憶去年稱壽日
劉梅盛事播詩章

湖州閔康侯寄外史逸詩多篇復動余索隱之興每展一元人集必有所附入同社馬退山手鈔祕本甚多因乞篋中所藏又得外史寄无言禪師詩五首但奉留揭學士曼碩一篇余向年已刻入上卷小有不同仍存之

奉留揭學士

柴荆馬糞間蛛網動相關閣老因移疾鰕生賴訂頑雨
涼修竹健沙僻睡鳧閒如許秋來意溪航忍獨還

龍翔大師秋後惠蘄簾

遮眼羣峰雨驚秋一葉風僧歸建鄴寺詩到豫章公鮭
菜真堪戀桃笙不待攻澡身方得計瓶外有餘空

次韻寄荅雲門斷江禪師

長眉如雪眼渾遮施食岩前坐暝鴉壞衲半堆黃木葉
好峰千朵碧蓮花湖山近日重來鶴池館於今足吠蛙

早晚越中尋賀老千秋觀在爾東家

送太祝陳柏

缺還京師

公子翩翩出太常南來使節擁輝光
製器上供清廟薦聚書內還東壁藏
天祿子雲終識字歲星方朔暫為郎
海漚零落洞庭野回首簫韶引鳳凰

龍虎山張一元一宿而去

神翁觀主來相訪既去猶如夢見之
閉戶著書吾黨事對牀聽雨昔人詩
萬羊何與分憂責一物終能係盛衰

回首孤雲自天末竹陰涼坐看蛛絲

元言禪師出紙俾書繆作錄近詩凡五首求方外正
之葛鳩張天雨皇恐頓首時至元五年秋七月廿又
一日也

予自蚤歲好鈔先賢秘本戊寅夏借荻溪王
凱度所藏朱性甫先生手鈔珊瑚木難第三
帙閱畢摘錄元時諸名家詩內有張伯雨五
首附錄寧極齋詩後適汲古閣主人毛子九
氏廣搜伯雨遺詩補刻因出舊本

同閱命錄出此則退山馬宏道識

長至前五日康侯又寄貞居二詩憶昔黃州
洪半石先生守毘陵時欲改惠泉為第一泉

首唱近體詩六首索余次韻讀貞居遊
惠山寺一篇喜三百年前早有同心

遊惠山寺

水品古來差第一天下不易第二泉石池漫流語最勝
江流湍急非自然定知有錫藏山腹泉重而甘滑如玉
調符千里辨淄澠罷貢百年離寵辱虛名累物果可逃
我來為泉作解嘲速喚點茶三昧手酬我松風吹兔豪

贈龍門恩公

恩公昔住天平日林下相迎壞色袍行到龍門無脚力

右肩偏袒喫櫻桃

句曲外史集補遺卷中

欽定四庫全書

句曲外史集補遺卷下

元 張雨 撰

後僕夫泉記

有宋高僧中庸子居孤山礪礪坡之院僕夫藝竹得泉
因以名之且復為之記循本而言信無棄人矣紹興初
勅遷院于寶雲山中庸真身之塔隨遷所不遷者泉耳
院去葛洪丹井數十舉武而近日唯井泉是汲甌挈云
勞匪一朝夕迺至正癸未之春塗墍殿廬壅土塔下舉

錘而靈脉潤導竅而清泉涌既浚既滌寒冽不渝於是
檻以密石覆之以亭重以僕夫標之示不忘其初嘻亦
異哉主僧芳洲潔雅之士行道修辭至於食飲種植之
微動循孤山法則猶以散泉不食為未足今獲一勺之
多不啻充滿其願來者相與嘆曰距祥符之世踰三百
載道源有續口澤如新芳洲其今之中庸子乎予謂是
泉之發初不擇地而密依猊座交蔭桂枝上人不易名
僕夫不與知其功利與茲山毋竭書以為後僕夫泉記

是歲夏四月

春日遊南山約

看長安花已是丈人之行問鐵鑪步聊從太史之觀甫
及春晴可無宿諾且驚峰暖洞衆人何莫由斯顧靈石
龍泓賢者而後樂此緇塵拂汗碧嶺長幽仰探玄豹之
深下笑飛蚊之聚風篁蕭爽憩德威二老之亭蟬冕輝
煌拜元祐諸賢之像徐行後長逸興邁倫撫中嶽外史
之書碑長虹貫日覓房山侍郎之題壁白雲啓扉放浪

形骸攄寫懷抱豈沙門不得稱高士而濁醪亦足名賢
人追觴詠之風流成談笑之故事盤餐為具酌必真率
會中車騎後時罰依金谷斗數儻居高遠徒費招邀至
正二年四月廿二日書

戲題黃大癡小像

全真家數禪和尚鼓貧子骨頭吏員臟腑

題顧善夫集十大家畫

玉峰顧善夫所藏名人書畫余得見者亦屢矣不若此

冊尤佳如名園中春花盛開雖紅紫黃白不一而各具
一種天然生意鬪麗爭妍善夫日夕危坐于怡樂堂中
焚香展對其領受當為不淺矣是日同觀者閑閑道人
吳全節至正丁未秋社日句曲外史張雨書

白曲外史集補遺卷下

欽定四庫全書

句曲外史集附

七月六日承貞居先生遠寄周鐘銑間有文象
鳧之形則考工記所謂鳧氏為鐘者也擊之與
夷則合而是日又適立秋古物之來豈偶然哉
輒成小詩拜貺之辱

趙孟頫

故人賞我趣遺我鳧氏鐘制與周禮合試扣聲春容是
日新秋節夷則還為宮懸之西楫下浮磬儼在東金石

金定四庫全書
互相應間以絲與桐八音雖未備古樂將無同鼎尊鐸
譚卣羅列見古風揖讓於其間令我懷周公作詩報佳
貺庶以開羣聾

題張外史馬塋新居

張翥

窈窕丹房古澗阿長松修竹繞層坡桃園隱者時相遇
茆洞仙人夜或過沆瀣杯寒供曉食青冥笙響答空歌
白雲浮出地痕滿知是龍泓宿雨多

中秋對月時張外史有約以醉不赴

張翥

明月中天烟霧消酒醒涼思正飄飄星河不動秋空闊
鐘鼓無聲夜寂寥露下遠山皆落木風來滄海欲生潮
僊家玩事無緣到虛負瓊樓聽玉簫

和張外史山居雪霽

張翥

窈窕阿人跡斷隱居學道自神凝巖頭鶴下松無雪
石底龍蟠水不冰釀酒春瓶濃勝乳抄書雲笈細如蠅
多君肯念還京客為織春袍柿蒂綾

宿張外史馬塍新居

薩都刺

竹樹忽聞乾鵲噪明朝歸去候新晴小樓無處著秋意
暗雨空山如海聲葉落窗虛聞鶴步峰回路轉斷人行
誰知昨夜玄洲客剪燭談詩到二更

夢張天雨

薩都刺

政恐梅花即是君一牀蝴蝶兩牀分邀予悟讀玄真子
羨爾偕升太素雲開篋取書銀字滅捲簾呼酒玉笙聞
覺來不省誰同夢雪影翻窗似水紋

寄句曲外史張伯雨

虞集

獨抱長鑱管白雲琴心誰錄內篇文清齋三日秋仍瘦
徧禮羣真夜每分石記恐妨塵外事山經聊許世人聞
已從司馬求真錄更為通章九老君

寄貞居張先生

虞集

司馬先生苦著書久食金液日清虛星辰欲動含精劍
雲霧長隨畢道車重憶仙翁千仞表為修真錄百篇餘
白頭供奉黃金盡靈笈伺因到隱居

送錢塘張天雨入茅山二首

虞集

獨棹扁舟入白蘋，隱居舊宅去棲真。
囊懸肘後惟丹訣，書到人間稱逸民。
未覺白雲留住晚，也應蒼术寄來頻。
手栽松上騎飛鶴，知是華陽第幾人。

又

隱居聞道無人跡，麋鹿來依積雪深。
每占雲氣得芝朮，莫怪月光穿樹林。
茅君自騎一虎下，木客或與羣猿吟。
知爾此時最相憶，遲予飛屨度千岑。

和荅張伯雨

范梈

靈均逝矣不堪呼幾欲南遊訊楚巫
城郭烟濤垂白帝星河風露浥黃姑
幽人昔恨九關豹佳士今猶千里駒
久客資君相慰藉可能無意謝飛鳬

過伯雨會無外式公劉君衍卿黃潛

廬山舊事誰能繼三十年前此會同
偶爾共來今日雨蕭然猶有古人風
坐深遥對花如霧興盡徐歸月在空
仰止前修那可作聊追餘響托無窮

次韻伯雨臘月八日雪中同登來鶴亭

黃潛

興來欲泛山陰雪，不奈舟膠野水凝。
朝士白頭愁獨步，仙人赤脚傲層冰。
招來盡是雞羣鶴，趨附空慚驥尾蠅。
夜久松龕同擁毳，絕勝僦值有青綾。

送張外史歸華陽

楊載

送君高舉入華陽，古洞深蟠石逕荒。
蔽日旌幢朝滌苑，飛空環珮夜琅琅。
食霞已試登仙訣，祀竈還修却老方。

見說陶公雖隱遁猶將道德佐齊梁

追和張外史山居雪霽

俞友仁

湖上千峰盡失青湖光十里未消凝吟詩細嚼梅花蘂
煮茗潛敲澗壑冰東郭忍寒行似鶴南屏癡醉坐如蠅
相過內相知乘興盛服猶披舊賜綾

伯雨書老杜花徑不曾緣客掃之句使童子持
以示略不運思足成詩

野僧

久聞方外有神仙只住華陽古洞天花徑不曾緣客掃

石牀今許借僧眠
穿雲去汲澆丹井
帶雨來耕種玉田
一自茅君成道後
幾人騎鶴下蒼烟

寄贈華陽洞隱者

袁桷

尸坐朝日雙臉醺
寢扉曉入香爐雲
苔石縱橫紫絲障
蓀花清淺青霓帟
北山猿鶴似有約
南崖鐘磬宜相聞
更欲深居入絕壑
築壇夜禮三茅君

莫春計籌山寄句曲山人

黃石翁

松花落粉啼子規
山人燕坐春晝遲
石泉豈非大韶樂

日色猶是鴻荒時
筠簾竹杖烟中語
青紙丹書林下詩
應謝錢塘舊知識
白雲獨往無還期

悼句曲外史

楊維禎

黃篋樓頭僊一去
明年黃篋掃狼峰
不知天上修玄史
只訝山中伴赤松
石室祕書愁攝電
星池遺劍已成龍
思君不見夜開戶
月在金鍾玉几峰

玄文館送張伯雨鍊師歸三茅 柳道傳

華林菌閣草菲菲
千樹啼鵑喚客歸
石上踞龜談未了

山中騎虎去如飛
白雲冉冉浮芝蓋
青雨踈踈灑葛衣
世外故多人物論
一枝丹筆待君揮

用韻重送

柳道傳

海上盧敖汗漫期
雨青雲白送將歸
步隨玉女明星出
夢載神山左股飛
迤徑常時多著屐
深林五月未更衣
冷飈忽動三君下
七尺冰絃信手揮

題張光弼選伯雨詩

高德暘

外史詩為人膾炙珠
光照浙西東
振衣玉宇瓊樓上

滌筆冰甌雪碗中龍去葛陂乘暮雨鶴歸華表語秋風
一瓢喜落廬陵手箇箇青錢鑄作工

題張伯雨初陽臺唱和卷

釋守仁

笙管聲沉彩鳳飛朝陽出海散晴暉一時文物推延祐
五夜丹光起太微歲月無情詩卷在江山如故昔人非
祇應湖上梅花月照見荒臺獨鶴歸

拜句曲外史墓二首

姚綬

百年尚友重文章登拜孤墳一瓣香赤壁舟中驚鶴夢

金定四庫全書
玉鈎橋下莫椒漿
匣藏神劍猶生氣
雲闕秋山自老蒼
雙眼摩挲舊碑刻
還疑清夜吐虹光

又

僊去端依絳節朝
僊壇環珮竟寥寥
字收渤海千軍陣
詩逼成都萬里橋
黃蔑樓空焦炬入
清風堂廢白雲銷
惟餘靈石山頭月
千古風華不待招

與張伯雨湖堤莫歸

吳養浩

柳絲淡蕩雨霏微
隔水遙看羽蓋飛
馬上僊人強支酒

踏花何處晚來歸

題張伯雨來鶴亭

虞集

羣真終夜降華陽
曾聽仙音近玉牀
語罷是誰留別鶴
待君寥廓共馳翔

又

亭前春雨長蒼苔
海鶴長鳴一日來
從此琴心三疊裏
月明時見影徘徊

與張天雨楊廉夫陳子平諸公遊虎邱

鄭元祐

昔吳有縣精茲邱據其領前瞻理金窰尚餘淬劍井簡
書畏懷異星日發光耿干將不剗兇牡鞠豈禁黽至今
點頭石斷非躍冶礦上機不由智大將寧論猛公剖儒
釋緒便從康莊騁詞鑄琬琰嚴聲抽輓轡哽掉鞅清淨
海不墮生死頃憶昔此來遊六月佩旌冷山靈寶其躅
歲月塵劫永我生若後時惜此媚風景坐嘯嗟所見起
舞顧具影箕尾橫青天有懷無從請

鶴巢次張貞居韻

胎禽巢居迴每在林表松棟梁架青冥戶牖瞰碧峰欲
睹仙者馭每懷塵外蹤玉童坐吹笙娟娟好顏容時歸
理其室護以虎與龍茅簷瑤草香欲往路莫從星宮集
群真霞光覆千重解后十洲上仙聖應相逢

題張伯雨留別卷

句曲外史儒仙師開口論事劍差差詩律精嚴奪天巧
字畫峭重含春姿一朝飄然上京邑赤墀不拜惟長揖

名稱藉藉諸公間落紙雲烟粲星日璽書令任西湖濱
忽思騎虎朝玉宸大茅峰頭斟北斗劍佩色映江南春
山經幽文與道帙歸藏靈澗之石室小刳猶割紫琳腴
大書應按皇人筆鬼物守護今幾年闔戶勒銘師亦仙
酒星在天炤酒泉

福鄉者因昭明道館名也出諸榛莽著文刻石覆之以亭
而巖洞泉石之脉近在百步內者皆按圖表之可以觀覽
泰定元年上清四十五代宗師劉君大彬朝京師授子始

末俾為之次第焉張君吳郡人名天雨內名嗣真字伯雨
別號貞居年二十棄家入道徧遊天台枯蒼諸名山吳
人周大靜先為許宗師弟子得楊許遺書張君從而以
為師悉受其說嘗從開元王君壽衍入朝被璽書賜驛
傳顯受教門擢任非其志也即自誓不希榮進因從三
茅之招追奉任君而下五君為文而告之願畢力茲宇
所著外史世集三卷碧岩玄會錄三卷又尋山志十五
卷考索極精博云嗚呼自任君始居此餘數百年才五

金定元月八日
附
人傳焉其自致于久遠者果何托也豈若後世各誘門
人系以私屬如家人父子者哉故寧希濶而有待今張
君無前代賜予之助徒草衣木食以營此而曠然思與
四方之士共為千載之期豈非豁落丈夫也哉予故與
君為方外友竒其能先予遠舉也故系之以詩曰

大茅南垂元氣積陰關闔扉陽洞闢曲穴流泉保靈宅
任君來餌黃赤石天一召錫太元冊曲阿受養良有擇
構宮方嚴自王伯清蹕臨止靈響格虛林森爽化赫奕

福卿帝子發甘液不食何年喪遺覽白雲映空玉清客
開元金盛煩有役持節旁午致纁璧爾來蕭條世代隔
石磴刻文土漫畫誰其啓之規古昔句曲外史美冠舄
研書千卷視貞白天真景隨玄系繹玉室金堂萬無數

師友集序

黃潛

師友集者張君伯雨所得名公贈言及倡酬之作也伯
雨之生去宋季未久其大父漳州通守公雅不欲諸孫
慕於貴驕而縱為異時華靡遨故事延儒先以為師教

之甚篤而伯雨特聰寤爽朗穎出不羣卅歲即務記覽
弄翰為辭章方是時前朝遺老宿儒魁士猶有存者數
百年之文獻賴以不墜然皆尊其所聞人自為學未嘗
凌高厲空併為一談以事苟同伯雨覲其光儀而聆其
緒論如企嵩岱而得其高臨河海而得其大且深佩服
之素固非一日年運而往諸老相繼淪謝伯雨乃以壯
盛時去為黃冠師間出而觀國之光屬當文明之代一
時鴻生碩望文學侍從之臣方相與鎔金鑄辭著為訓

典播為頌歌以鋪張太平雍熙之盛伯雨周旋其間又
皆與之相接以粲然之文如塤鳴而簫應也逮伯雨勸
遊而歸入山益深入林益密竝遊之英俊多已零落而
伯雨亦老矣後生晚出如春華夕秀奇采遽發欲一經
伯雨之品題者無不挾所長以為贊而伯雨皆莫之拒
雖細弗遺宜其所積之富如此嗟夫伯雨負其超邁卓
絕之材不徒有聞於家庭而脫落綺紈之習遂能遺世
獨立周覽六合必欲盡大觀而無憾其高風雅志固可

槩見也雖然四十年間氣運有升降人物有盛衰而文章之變化與之相為無窮述作之家尚有考焉詩文總若干篇其次第不係乎齒爵位望而一以歲月為後先方外一二士既編輯而校讐之復俾潛為之序而刻真伯雨所居靈石山之登善菴潛之鄙陋言不足以盡意序續集者寧不為之畢其說乎

張外史馬塍菌閣記

陳旅

錢唐邑屋叢轆數十里至為重樓以居委巷若閭市人

氣滄鬱為潯霧城西山水清曠而笙歌粉黛上下無空
日夫杭東南奧區芬華之所族而幽靜者之所處也城
北有村曰馬塍居民多業藝花土沃俗質聚近而墟遠
至元間句曲外史來棲焉為閣四楹桂卉叢植旁有長
松數十章落落如高人湖山之上騰伏閣外益得沖覽
之會者外史舊有菌閣在金菌山吳興趙文敏公篆榜
極古茲復以真蹟署新閣意扁舟往來所志在金山也

句曲外史集錄序

姚綬

錢唐張伯雨先生元季碩儒逃名于方外其制作與古人相伯仲予嘗私淑其真行書購求真迹或卷或軸長篇短章又有其手書詩文稿各一帙總若干篇保若拱壁藏之雲東仙人館成化丁未六月火盡焚其所積圖史而先生之跡俱逝者十之八九先生平生詩文甚多梓行者尠余所得一編僅百餘首乃徐良夫作序者又余幼時先君子命抄錄五七言八十餘首今皆不存余茲暇日爰就相知士大夫家搜訪其所作若詩若文雜

著并余家煨燼之餘所僅存者番書于冊名曰句曲外
史集錄俟既富而類析之壽梓以行嗟夫人之生世古
今未有超然獨存者所賴壽之於不死其文章乎故凡
文章根柢于道自信可以傳後雖流散海內後必有人
收錄必不使之敗壞漸盡若韓昌黎之文歐陽子永叔
得之於散漫之餘行於校讎之後遂為四大家之冠輝
煌轆轤垂之無窮人第患不能為可傳者無患乎千載
之下不得流播也吾道在天地間不絕如綫世豈無其

人哉斯可驗諸

外史張公墓碑銘


姚綬

嗚呼此句曲外史貞居先生張公墓也南屏之右西湖之陽梁題五鉤澗度靈石路披篠樹隍帶烟霞石室藏書碑文紀事其形雖逝其神則存翰墨在人文章垂世儼然生氣之張皇警欬無聲周旋滅影穆若太虛而示寂開元精舍久無繼續之賢句曲貞居全乏訪求之彥遂使墓門荒翳兆趾崩奔松栢摧為薪莫設時樵之禁

負世是何物曾罹夜客之侵痛茲劍躍雷津嘅爾研離
玉匣既往何咎將來可圖曠世而默契余心尚友而景
行前哲爰合佳士聿來嗣人即冢土以增崇求體魄之
綏靜其灌其柶于以植夫美材有紀有堂于以開夫幽
隧不有伐石將安載詳是欲喚起令威再返遼東之白
鶴招還曼倩同瞻雲外之青鸞第恐紫極高棲罔由下
邁自謂黃中密邇端冀旁臨先作傳以述夫始終翠珉
是託復贊銘以紀夫歲月彤管庸書銘曰

於厥張公天雨伯雨是名是字早曰貞居晚曰外史厥
號不一幻僊亦爾文章闢古鑿鑿齒齒書法俊逸不豈
以止樂道忘我人莫之訾相靈石澗爰墓于茲有峰而
岌有水而駛喬喬者林盈盈者芷迴絕風塵攸驅虎兕
以巖為扃以雲為峙朝烟夕霏紆青委紫時遠世異毋
怪頽圯聿修增之屬後來士於厥張公克具衆美周聃
之學洞究玄旨獨立羽化匪忽焉死光華曷居天漢之
涘謫予銘者式味妙理矧嗣教人其不興起薦溪之毛

挹齊之醴公恒賁斯以陟降只



句曲外史集附